

Hund an kein Wild hetzen/noch desselbigen Rechts zu geniessen gestatten/den zwischen eines Hirsches vnd Wilds Wildpret sehr grosser vnterscheid ist / wie denn solchs die erfahrung gibt vnd mit sich bringt/ Denn welches Wildpret/ es sey gleich Hirsch/ Wild/ Schwein oder Hase/ sie das erste mal jagen/ desselbigen gewohnen sie nachmals allezeit/ bevorab/ wenn man sie von desselben Wildpret gepfneicht hat. Man sol auch zum andern die Hund nicht zu den Wehrtüchern gewehnen/ den der Hirsch thut nicht anders denn sich ombwenden / damit er den Hunden entfliehe / vnd wenn du nachmals die Hund one Tücher brauchen soltest/ so setzen sie auß/ vñ liessen von stundan ab/ zu dem auch/ wenn der Hirsch ein/ zwey oder dreymal wicklet / so folgen sie so bald der vnrechten als der rechten Fahrt nach/ vnd verirren sich/ lernen also weder suchen noch jagen / sondern sehen allein mit auffgerichtetem Kopff vnd Augen dem Hirsch vergeblich nach. Man sol auch zum dritten die jungen Hund des Morgens früe nit leichtlich zur Jagt brauchen / denn wo sie des morgen Thauwes einmal gewohnen/ so wollen sie nachmals nicht suchen noch jagen/ so bald sie des Tags hitz empfinden. Man kan sie aber auff ein ander weiß abrichten/ vnd inen jr recht geben/ wie folgt.

Erstlich ist zu sehen vnd warzunemen/ wenn der Hirsch in der Hirschfeiste ist/ denn zur selbigen zeit ist er nicht so listig/ kan auch nicht so schnell vnd fertig lauffen/ als im Aprillen vñ Meyen/ wenn er was gering Leibiger vnd Mägerer/ auch schneller vnd behenders lauffs ist. Als denn kan man einen außwehlen/ in welchem die Posten fast bequem vnd tauglich/ vñ die junge Hund sampt vier oder fünff alten/ dieselbigen anzuführen/ zu hauff thun / Nachmals sol man sie zur eussersten vnd weitesten Post führen/ vnd den Hirsch mit etlichen Hunden/ welche ihm im lauffen keine ruhe lassen/ biß so lang er gar ermüdet vnd erlegen/ ihnen entgegen jagen/ vñnd als denn die alten Hund zum ersten abkupplen vnd ablassen. Vnd wenn sie auff des Hirsch Fahrt kommen/ vnd von einander gelassen vnd abgesondert/ mag man als denn die junge Hund abkupplen vnd nachfolgen lassen/ auch drey oder vier guter fleissiger Jäger ihnen zugeben / welche / daß kein Hund dahinden bleibe/ oder sich sonsten faul vnd träg erzeige / gute achtung geben / vnd ist allhie zu mercken/ daß eben an demselbigen ort/ da der Hirsch erlegt wirt / er auch zerwirckt werden sol / vnd den Hunden also ihre Recht auff dem Feld/ welchs ich sehr nützlich erachte/ noch aller frisch vnd warm reiche.

Das achzehende Capitel.

Wie man junge Hund zum Hirsch abrichten/ vnd auff ein ander weiß ihr Recht geben sol.



**A**n sol einen Hirsch erlegen/ vnd ihm der fördern Läufl einen zwischen beyden Klauwen biß auff das Geleich abspalten/ oder aber der Läufl Klauwen einen ganz vnd gar abschneiden/ vnd alsden auß dem Zeug widerumb lauffen lassen/ vnd ein viertheil einer Stundt hernach alle junge Hunde/ sie kühn zu machen/ dar führen/ vnd die Leithund dem Hirsch nachsuchen lassen/ welche mit den jungen Hunden folgen sollen/ Vnd wo sie eines Armbrustschuß lang gefolget/ soltu im Horn jagen/ weiß solches beschehen/ soltu die jungen Hund von den alten abkupplen/

MMM ij

damit